

ጳውሎስ ፊልጲሲዩሳ ኣሳስ ፃፊዳ ኪታ ጋሳ ቆፋ

ጳውሎስ ፊልጲሲዩሳ ኣሳስ ፃፊዳ ኪታይ ፃፊትዳይ፡ ርሜ ቢታን ማቄዶኒያ ኣውራጃን፡ ፊልጲሲዩሳ ቢታን ዳዒያ ዋሳ ኬላሳ። ሄ ዋሳ ኬላይ ጳውሎስ ኣወርጋ ቢታን ኮይሮ ኤሲዳ ዋሳ ኬላ። ሃ ኪታይ ፃፊትዳይ፡ ጳውሎስ ቃሾ ኬላን ዳዒያ ዋዳ ሃራ ኣማኒያ ኦሳንቸት ኢያ ኢዲዳ ዋዳይ ፊልጲሲዩሳ ዋሳ ኬላን ዳንዲዳ ዋርዶ ተሚርቲያ ጋሶን ኢያ ዋዛናይ ዳሮ ኣዛኒዳ ዋዳ። ጊዶሺን፡ ጳውሎስ ዩሱስ ኪሪሰቶሳ ሚንሉዲ ኣማኒያ ጊሾ ሃ ኪታን ቆንጨዲ ቤንቴይ፡ ኡፋይሲ፡ ኩሚላ ኣማኔቴላ። ፊልጲሲዩሳን ዳዒያ ዳሮ ኣሳይ ርሜፔ ዲዔቲዲ ዩዳ ኣሲ። ኤንቲ ርሜ ቢታስ ሚሹቶሶና ኡይላ ናጎሶና። ኤንታፊ ኢሶቲ ኢሶቲ ኣማኒዲ ባንታ ቢታ ኣሳን ጎዴቲዶሶና። ሄ ጎዳይ ኤንታ ቦላ ሚቶኔ ማንቆቴላ ኤሂስ (ሃ.ኦ 16:20-21)።

ጳውሎስ ሃ ኪታ ፃፊዳ ኮይሮ ጋሶይ ኢያ ማቲዋ ዋዳ ኢያ ማዳናው ፊልጲሲዩሳ ኣማኒያ ኣሳይ ኢሞታ ኢያው ዩዲዳ ጊሾ ኤንታ ጋላታናሳ። ኢያ ቦላኔ ኤንታ ቦላ ዲማ ዲማ ሚቶይ ጋኪዳባ ጊዲኮካ ኤንቲ ሚኔታና ማላኔ ኩሚላ ኣማኔቲዲ ዳና ማላ ሃ ዳሚዳ ኢንጂያን ኤንታ ሚንሉሴስ። ጨቆኔ ኦቶሮ ኣገዲ፡ ዩሱስ ኪሪሰቶሳ ኣሽኬቴላን ኤንቲ ኩማና ማላ ሚንሉዲ ኤንታ ኣኬኪሴስ። ዩሱስ ኪሪሰቶሳራ ኢሲፊ ጊዶን ኤንቲ ዳሚዳ ዳያይ ያሳ ኣጶ ኬሃቴላፊ ፑልቲዳይሳኔ ኣማኖን ኤንቲ ኤኪዳይሳፊ ኣቲን ኣይሁዳታ ዋጋ ፖሎን ቤንቴዳባ ጊዶናይሳ ኤንታ ኣኬኪሴስ። ዩሱስ ኪሪሰቶሳራ ኢሲፊ ዳዒያ ኡባስ ያሳይ ኢሚያ ሳሩዋኔ ኡፋይሳ ኤንታው ፃፊስ።

ሃ ኪታይ ኤሬቴይ ኡፋይሲ፡ ኣማኔቴላ፡ ኢሲፊቴላኔ ኣማኖን ሚኒዲ ዳያ ቆንጨሲዲ ቤሴይሳና። ሄሳ ቦላ ጉጂዲ፡ ጳውሎስ ፊልጲሲዩሳ ዋሳ ኬላ ሲቂያ ጊታ ሲቁዋ ቆንጨሴስ።

ፊልጲሲዩሳ ኪታ ኣይፊ ቆፋታ

- ጌሎ ቆፋ 1:1-11
- ጳውሎስ ሃኒዲ ዳዒያ ዲሳ 1:12-26
- ኣማኖን ለሚሶ ዳያ 1:27-2:18
- ዊሞቲዮሳሲኔ ኤጳፊራዲቱስ ዳዒያ ቆፋ 2:19-30

ሞርኬታፔኔ ኢታታፔ ናጌቴሉ 3:1-4:9

ጳውሎሳኔ ፊልጲሲዩሳ ኣማኒያ ኣሳ 4:10-20

ሳሮሶኔ ኣንጅ 4:21-23

1 ኪሪሰቶስ ዩሱሳራ ኢሲፊዳ ጊሾ ያሳባ ጊዲዳ፣ ፊልጲሲዩሳ ካታማን ዴዒያ ዋሳ ኬላ ጨማታሲኔ ዳቆኔታ ኡባስ። ዩሱስ ኪሪሰቶሳ ኣይሌ ጊዲዳ፣ ጳውሎሳፔኔ ዪሞቲዮሳፔ ኪቴቲዳ ኪታ።

2 ኑ ኣዋ ያሳፊኔ ጎዳ ዩሱስ ኪሪሰቶሳፔ ኣቶ ኬሃቴላይኔ ሳሮቴላይ ሂንቴው ጊደ።

ጳውሎሳ ጋላታ ዋሳ

3 ታኒ ሂንቴና ቆፒያ ዋዴ ኡባን፣ ታ ያሳ ጋላታይስ።

4 ታኒ ሂንቴ ኡባስ ያሳ ዋሲያ ዋዴ ኡፋይሳን ዋሳይስ።

5 ሂንቴ ኮይሮ ጋላሳፔ ሃዒ ጋካናው፣ ዋንጌላ ማርካቴይሳን ታራ ኢሲፊ ጊዲዳ፣ ታና ማዲዳ ጊሾ ያሳ ጋላታይስ።

6 ሂንቴ ጊደን ሎዖ ኦሶ ደሚዳ ያሳይ፣ ኪሪሰቶስ ዩሱሲ ሲሚያ ጋላሳይ ጋካናው፣ ፖላናይሳ ኤራይስ።

7 ሂንቴ ኡባ ዋዴ ታ ዋዛናን ዴዒታ። ታኒ ኡባ ዋዴካ ሃሳዳ ቆፓናው ቤሴስ። ሃዒ ታኒ ቃሾን ዴዒሼኔ ቃሼታናፔ ሲንጼ ዋንጌላ ናጎኒኔ ዋንጌላ ሚንላ ኤሶን ያሳይ ታው ቃዲዳ ቃዳ ሂንቴካ ታራ ሻኬቲዳታ።

8 ታኒ ሂንቴና ኡባ ኪሪሰቶስ ዩሱሳ ሲቁዋን ኣይ ሚላ ላሞቲያኮ ያሳይ ታው ማርካ።

9 ሂንቴ ሲቆይ ቱማ ኤራቴላራኔ ኣከካራ ኢሲፊ ጉጂ ጉጂ ዲጫና ሚላ ያሳ ዋሳይስ።

10 ሃሳን ሂንቴ ሎዖባ ሻኪዲ፣ ደሬይሳታ፣ ኪሪሰቶሲ ሲሚያ ጋላሳን ጌሻታኔ ቦሬቶናይሳታ ጊዳና።

11 ሂንቴ ዴዖይ ያሳ ቦንቹዋሲኔ ጋላታስ ዩሱስ ኪሪሰቶሳ ባጋራ ቤንቴያ ዪሎቴላ ኣይፊያን ኩሚዲ ኣይፋና።

ጳውሎሳ ቃሼቴላይ ዋንጌላይ ዳልጋና ሚላ ማዲስ

12 ታ ኢሻቶ፣ ታና ጋኪዳ ኡባይ ዋንጌላይ ዳልጋና ሚላ ቱማ ማዲዳይሳ ሂንቴ ኤራና ሚላ ኮያይስ።

13 ታኒ ኪሪሰቶሳ ጊሾ ቃሼቴዳይሳ፣ ካዋ ኬላ ናጌይሳቴኔ ሃይሳን ዴዒያ ሃራቲ ኡባይ ኤሮሶና።

14 ታ ቃሹዋ ጋሶን ኑ አሻታፔ ዳርቲ ጎዳን ኬሂ አማኔቲዶሶና። ሄሳ ጊሾ፣ ያሳ ቃላ ያሺ ባይና ካሴይሳፌ አቋ ሚኒዲ ኑዳና ማላ ሚኖቴላ ዴሚዶሶና።

15 ጊዶሺን፣ ኢሶቲ ኢሶቲ ቃናቴኒኔ ፓላማን ኪሪሰቶሳባ ኦዶሶና፣ ሺን ሃራቲ ሱሬ ዋዛናፔ ኦዶሶና።

16 ሱሬ ዋዛናፔ ኦዶይሳቲ፣ ያሳይ ታው ዋንጌላ ናጎ ኦሶ አሚዳይሳ ኤሪያ ጊሾ ሲቆን ኦዶሶና።

17 ሺን ታና ቃናቴይሳቲ ታ ቃሹዋ ቦላ ሃራ ማቶ ኤሃናባ ኤንታው ዳኒን ባንታና ዶሲዲ ኪሪሰቶሳባ ኦዶሶናፔ አቲን ቱማ ዋዛናፔ አዶኮና።

18 ሄሲ አይኮካ ማቴና። ቱማ አጌን ጊዲን ዋይኮ ዋርዶ አጌን ጊዲን ሄ ኡባን ኪሪሰቶሲ ሳባኬቴሰ። ታና ሄሲ ኡፋይሴሰ። ቃሲ ሃራባይ ታና ኡፋይሴሲያባይ።

19 ታኒ ሂንቴ ዋሳኒኔ ዬሱሰ ኪሪሰቶሳ አያና ማዲዋን አታናይሳ ኤሪያ ጊሾ ታና ኡፋይሴሰ።

20 ታ ጌታ አሞይኔ ኡፋይሳን ናጊያ ናጎይ ታ ዬላቶና አታናይሳ። ሺን ኡባ ዋዴ አሌይሳዳ፣ ሃዲካ ታኒ ፓፃ ዴዲን ዋይኮ ሃይቂን ያዮና ታ ኩማላ አሳቴላን ኪሪሰቶሲ ቦንቼታና ጋዳ ሚኖቴላን ኦዳይሰ።

21 ታ ዴዲኮካ ኪሪሰቶሳ ፃላላሰ ዴዲይሰ፤ ቃሲ ታ ሃይቂኮካ ታው አቋዳ ዋዴ።

22 ሺን ታ ፓፃ ዴዲኮ አይፌይ ዴዲያ ኦሶ ኦላና። ሺን ፓፃ ዴዲይሳፌኔ ሃይቆፔ አዉሳ ዶራኔኮ ታው ኤሬቴና።

23 ታኒ ሃ ናምባታፔ አዉሳ ዶራኔኮ ኡንዴታሰ። ሃ ዴዑዋፔ ሻኬታዳ ኪሪሰቶሳራ ኢሲፌ ዳናው አሞታይሰ፤ ኪሪሰቶሳራ ኢሲፌ ዴዲይሲ ኡባፌ አቋዳ ሎዶ።

24 ሺን ታኒ ሂንቴ ጊሾ ፓፃ ዴዲይሲ ሂንቴው ዳር ኮሺያባ።

25 ሄሳ ታኒ ጌሻዳ ኤራይሰ፤ ታኒ፣ ሂንቴ አማኖን ዲጫናዳኔ ኡፋይታናዳ ሂንቴራ ፓፃ ዳና።

26 ሄሳ ጊሾ፣ ታኒ ሂንቴኮ ሲማዳ ያ ዋዴ ኪሪሰቶሰ ዬሱሳራ ሂንቴ ዴዲያ ዴዑዋን ታናን ዴዲያ ጩቁቴላይ ሂንቴው ዳራና።

27 ኡባፌ አሊዲ፣ ሂንቴ ኪሪሰቶሳ ዋንጌላሰ ቦንቾ ኤሂያ ዴዶ ዴዲቴ። ታ ሂንቴና ቤዲን ዋይኮ ቤዶና ኢዲን ሂንቴ ኢሲ ቆፋን ሚኒዲ ኤቁዲ፣ ሃራቲ ዋንጌላን አማናና ማላ ኢሲ ዋዛናን ጊዲዲ ኢሲፌ ባፃቴይሳ ታ ሲዳና።

28 ሂንቴ ሞርኬታሰ ያዮፊቴ። ኤንቲ ሂንቴራ ኤቁቴያባ ጊዲኮ ሄሲ ሂንቴው አቶቴላሰ፣ ኤንታው ቆዮሰ ያሳፌ ጊዲዳ ማላ።

29 ኪሪሰቶሳን ኦሴያ ቃዳይ ሂንቴው ኢሜቲዳይ፡ ሂንቴ ኢያ ኣማናና ማላ ፃላላ ጊደናሺን ሂንቴ ኢያ ጊሾ ሜቶ ኤካና ማላሳ።
 30 ሄሳ ጊሾ፡ ሂንቴ ታ ዋያ ካሴ ቤዒዴታ፤ ሃዒካ ታ ዋዬቴይሳ ሲዔታ። ሂንቴካ ታ ዋያ ማላ ዋዬቴታ።

2

ቱማ ኣሽኬቴላ

- 1 ኪሪሰቶሳን ሂንቴ ዴዒያ ዴዖይ ሂንቴና ሚንጼሰ፤ ቃሲ ኢያ ሲቆይካ ሂንቴና ሚንጼሰ። ጌሻ ኣያናራ ሂንቴው ኢሲፊቴላ ዴዒሰ፤ ሂንቴ ሃራታሰ ኮሄታኔ ቃዴቴታ።
- 2 ሂዛ፡ ሂንቴ ኢሲ ቆፋን፡ ሲቆን፡ ኢሲ ዋዛናኒኔ ኣያናን ኢሲኖ ጊዲዲ ታና ፖሎ ኡፋይሲቴ።
- 3 ሂንቴና ደሶን ዋይኮ ጨቄቲያ ሃዳ ኣሞን ኢሲባካ ኦሶፊቴ። ሺን ሂንቴ ኢሶይ ኢሱዋፊ ገታታይሰ ያጊዲ ቆፖና ሂንቴና ካዉሺቴ።
- 4 ሂንቴ ኢሶይ ኢሶይ፡ ሃራ ኣሲ ማዲያባ ኮዩቴፔ ኣቲን ሂንቴና ማዲያባ ፃላላ ኮኖፒቴ።
- 5 ኪሪሰቶስ ዬሱሳን ዴዒያ ቆፋይ ሂንቴናን ዳናው ቤሴሰ።
- 6 ኢያው ኡባ ዋዴ ያሳ ሃኖቴላ ዴዒሰ።
 ያኒያ ጊሾ፡ ኢያ ያሳራ ኢሲኖ ኦሴያ ሃኖታ፡
 ዋልቃን ኤካናው ኮዩቤና።
- 7 ጊደሺን፡ ኢ ባው ዴዒያ ቦንቹዋ ኡባ ኣጊዲ፡
 ኣይሌ ሜዴታ ኤኪሰ፤
 ኣሴ ዳኒዲ ቆንጨሰ።
- 8 ኢ ባና ካዉሺሰ፤
 ሃይቃና ጋካናው፡
 ሃሪ ኣቶሺን ማሰቃሊያ ቦላ
 ሃይቃናው ኪቴቲሰ።
- 9 ሄሳ ጊሾ፡ ያሳይ ኢያ ዳር ጶቁ ጶቁ ኦሴሰ፤
 ቃሲ ሱንሳ ኡባፊካ ኣዲያ ጶቃ ሱንሳ ኢሚሰ።
- 10 ሳሎኒኔ ሳዓን፡
 ሳዓፔ ጋርሳን ዴዒያ ኡባይ፡
 ዬሱሳ ሱንሳ ቦንቹዋሰ ፑልባታና።
- 11 ኣሳ ኡባይ ባንታ ኢንፃርሳን፡
 ዬሱሰ ኪሪሰቶሳን ጎዳ ያጊዲ፡
 ያሳ ኣዋ ቦንቹዋሰ ማርካታና።

ሃ አላሚያስ ፖ ጊዶ

12 ታ አሻቶ፣ ታኒ ሂንቴራ ደዲያ ዎዴ ኡባን ሂንቴ ከቴቲዳይሳዳ፣ ሃዒ ታኒ ሂንቴ ማታፔ ሃኪንካ፣ ካሴይሳፊ አሊዲ፣ ከቴታናው ቤሴስ። ያሳስ ያሻኒኔ ኮርሳን ሂንቴ አቶቴላ ፖላናው አሊቴ።

13 ያሳይ፣ ሂንቴ ኢያው ኤር ጊዲ ከቴታና ማላ ኡባ ዎዴ ሂንቴ ጊዶን አሌስ።

14 አይ ኦሶ አሊሼካ ዙዙሞና ዎይኮ ፓላሞና አሊቴ።

15 ጌላኔ ናጋራንቾ አሳ ጊዶን ቦሬቶናይሳታ፣ ጌሻታኔ ፖኮይ ባይና ያሳ ናይታ ጊዲቴ። ሂንቴ ኤንታ ጊዶን ሳሎ ያሊንቶዳ ፖዒሼ።

16 ዴያ አሚያ ከታ ኤንታው አዲቴ። ሄ ዎዴ ታ ዳቡሪሳይኔ ታ ኦሶይ ማላ አቲቦና ጊሾ ከሪስቶሲ ያ ጋላስ ታ ሂንቴናን ጨቄታና።

17 ሂንቴ ያሳስ አሚያ አማኖ አሞታ ቦላ ታ ሱላይ ኡሻ ያርሾዳ * ጉኪኮካ ታና ኡፋይሴስ። ሂንቴካ ታራ ኡፋይታና።

18 ሄሳዳ ሂንቴካ ኡፋይቲዲ ታናካ ኡፋይሳናው ቤሴስ።

ዲሞቲዮሳኔ ኤጳፊራዲቲሳ

19 ታኒ ሂንቴ ዴቡዋባ ሲዓዳ ኡፋይታናው ዲሞቲዮሳ ሂንቴኮ ኤሌሳዳ ዬዳና ማላ ጎዳ ዬሱሲ ታና ማዳናይሳ አማኔታይስ።

20 ሂንቴ ዴቡዋስ ዎዛናፔ ቆፒያ ኢያ ማላ አሲ ሃሪ ኦኒካ ባዎ።

21 ሃራቲ ባንታና ጎዒያባ ኮዮሶናፔ አቲን ዬሱስ ከሪስቶሲ ኮያባ አሐኮና።

22 ኢ ታራ ኢሲፊ ጊዲዲ ናዒ ባ አዋስ አሌይሳዳ ዎንጌላ ኦሶ አሊዲይሳኔ አማኔቲያ አሲ ጊዴይሳ ሂንቴ ኤሪታ።

23 ሄሳ ጊሾ፣ ታባይ ሃኒያባ ቤዓዳ ኤሌሳዳ ኢያ ሂንቴኮ ዬዳና ጋዳ ቆፓይስ።

24 ታኒ፣ ታ ሁዔን ማታ ዎዴን ሂንቴኮ ባናይሳ ጎዳን አማኔታይስ።

25 ሄሳዳካ፣ ታኒ፣ ታ አሻ ኤጳፊራዲቲሳ፣ ታራ ኢሲፊ ታ ባጋ ጊዲዲ አሊዲይሳ፣ ኦሊቲዲይሳኔ፣ ታና ማዳናው ሂንቴው ከቴቲዳይሳ፣ ሂንቴኮ ከታናው ቆፓስ።

2:15 ዛሬ 32:5 * 2:17 ታ ሱላይ ኡሻ ያርሾዳ፣ አሲ አሲ ዎዴ ያርሾ ቤሳን ያርሾቲያ ማሄ ያርሾቀ ቦላ ሃሌ ዎይኮ ዎይኔ ኡሻይ ጉኪስ።

26 ኢ ሂንቴና ኡባ ቤዓናው ዳሮ ላሞቴሰ። ቃሲ ኢ ሃርጌቴዳይሳ ሂንቴ ሲዒዳ ጊሾ ባ ዎዛናን ዳሮ ኡንዔቴሰ።

27 ኢ ቱማ ሃርጌቴዳ ሃይቂ ኪቺዳ ኣቲሰ። ሺን ያሳይ ኢያው ቃዴቴሰ። ኢያ ዓላላሰ ጊዶናሺን ኣዛኖይ ኣዛኖ ቦላ ጉዜቶናዳ፣ ታዉካ ቃዴቴሰ።

28 ሂዛ፣ ሂንቴ ኢያ ዛሪ ቤዒዳ ኡፋይታናዳ ታዉካ ታ ዎዛና ሴላይ ኢርፃናዳ ታኒ ኢያ ኤሌሳዳ ሂንቴኮ ዬዳናው ኣሞታይሰ።

29 ጎዳሰ ሃጋዚያ ኣሳዳ ኢያ ኩሜላ ኡፋይሳን ሞኪቴ። ቃሲ ኢያ ሚላ ኣሳ ኡባካ ቦንቺቴ።

30 ሂንቴ ታ ማታን ጊዲዲ ኦላናው ዳንዳዖና ማዲያ ማዲዲ ኪሪሰቶሳ ኦሱዎ ጊሾ ባ ሺምፑዎሰ ሚሼቶና ኢደዲ ሃይቂ ኪቺዳ ኣቲሰ።

3

ቱማ ዒሎቴላ

1 ዉርሴላን፣ ታ ኣሻቶ፣ ሂንቴ ጎዳባ ጊዲያ ጊሾ ኡፋይቴቴ። ታኒ ካሴ ዓፊዳይሳ ዛራዳ ዓፋናይሲ ታና ዎይሴና፣ ሺን ሂንቴና ባላፔ ናጋና።

2 ኢታባ ኦሊያ ካናታፔ፣ ቃሲ ቃዓሬታናው ኮሼሰ ጊያ ኢታ ኣሳታፔ ናጌቴቴ።

3 ኦኒ ያሳ ጌሻ ኣያናን ጎይኒያ ጊሾኔ ኦ ዴዑዎን ኪሪሰቶሰ ዬሱሳን ጨቄቴያ ጊሾ ቱማ ቃፃሮ ቃፃሬቴዳይሳታ። ኦኒ ካሬ ኣሳቴላ ቦላ ኦሴቴያባን ጨቄቶኮ።

4 ታ ካሬ ኣሳቴላን ጨቄታናው ኮሺኮ ታ ዳሮባን ጨቄታናው ዳንዳዓይሰ። ኣይ ኣሲካ ባ ካሬ ኣሳቴላን ጨቄቴያባይ ባው ዴዔሰ ጊዲ ቆፒኮ፣ ታኒ ኢያፔ ዳሮ ኣዳዳ ጨቄቴያባይ ዴዔሰ።

5 ታኒ ዬሌቴዳ ሳሚንታራ ቃፃሬታሰ። ታኒ ዬሌታን ኢሰራዔሌ፤ ታኒ ቢኒያሜ ዛሬ፤ ታኒ ዋላኪ ባይና ኣይሁዴ ኣሴ። ኣይሁዴ ሂጌ ናጎን ጊዲኮ ታኒ ፋሪሳዎ።

6 ኣይሁዴ ኣማኑዎሰ ሚሼቴላን ጊዲኮ ታኒ ዎሳ ኬላ ዬዴላሰ። ኢሲ ኣሲ ሂጌ ናጊዲ ዒሊያባ ጊዲኮ፣ ታናን ቦሬይ ቤንቴቤና።

7 ሺን ካሴ ታና ማዴሰ ጋዳ ቆፒዳባ ኡባ፣ ኪሪሰቶሳ ጊሾ ጋዳ ማዶናባ ኣላዳ ታይባሰ።

8 ሄሳ ዓላላ ጊዶናሺን ታኒ ታ ጎዳ ኪሪሰቶሰ ዬሱሳ ኤሬይሲ ሃራባ ኡባሬ ዳሮ ኣዲያ ጊሾ ሄ ኡባ ዎዴይ ባይናባዳ ታይባሰ።

3:5 ሃ.አ 23:6፤ 26:5፤ ሮሜ 11:1 3:6 ሃ.አ 8:3፤ 22:4፤ 26:9-11

ታኒ ኢያ ጊሾ ኡባባ ጳያሰ። ከሪስቶሳ ዴማናው ኡባባ ዎራ ሆሎቲዳ ቡሬዳ ታይባይሰ። ታኒ ዬሱሳራ ኢሲኖ ጊዳሰ።

9 ታኒ ሂጌሰ ከቴታዳ ዴሚያ ታ ሁዔ ዲሎቴላ ታው ባዎ። ከሪስቶሳ አማኒን ቤንቴያ ዲሎቴላይ፣ ያሳ ማታፔ ያ ዲሎቴላይ ሃዒ ታው ዴዔሰ።

10 ታኒ ከሪስቶሳኔ ኢያ ዴንዶ ዎልቃ ኤራናው ኮያይሰ። ታኒ ኢያ ሜቱዎ ኢያራ ሻኬታናዉኔ ኢያ ሃይቁዎን ኢያ ዳናናው አዎታይሰ።

11 ሄሳዳካ፣ ሃይቆፔ ዴንዳዳ ሜሪናው ዴዎን ዳናይሳ ኡፋይሲ አላይሰ።

ጋፃ ጋካናው ዎዲቲ

12 ታኒ ሃዒ ጋፃ ጋካሰ ዎይኮ ታናን ባሊ ባዎ ጊኬ። ሺን ከሪስቶሰ ዬሱሲ ታና ኦይኪዳ ጊሾ ታኒ ታ ሲንላን ዴዒያ ዎይቱዎ ኦይካናው ዎፃይሲኔ ቡቴታይሰ።

13 ታ ኢሻቶ፣ ታኒ ሄሳ ዴማሰ ጋዳ ቆፒኬ፣ ሺን ታኒ ኢሲባ አላይሰ። ታፔ ጉዬራ ዴዔይሳ ደጋዳ ሲንላን ዴዔይሳ ኦይካናው ዛቱራይሰ።

14 ሄሳ ጊሾ፣ ታኒ ጋፃ ጋካናው ዎፃይሰ። ያሳይ ከሪስቶሰ ዬሱሳ ባጋራ ሳሎ ዴዐዎሰ ያጊዳ ዎይቱዎ ኤካናው ዳቡራይሰ።

15 ሂዛ፣ ኑኒ አያናን ጋሽቲዳ ኡባይ ሄሳ ቆፓናው ቤሴሰ። ሂንቴፌ ባጋታሰ ዴማቲያ ቆፊ ዴዒኮ፣ ሄሳካ ያሳይ ሂንቴው ቆንጪሳና።

16 ጊዲኮካ፣ ኑኒ ሃኖ ጋካናው ዴዒዳ ዴዐዎን፣ ኦኔ ሲንሌ ቦሰ።

17 ታ ኢሻቶ፣ ታና ዳኒቲ፤ ሄሳዳካ፣ ኑ ለሚሱዎ ካሊያ አሳታ ኦኬኪዲ ቤዒቴ።

18 ታኒ ሄሳ ሂንቴው ካሴ ዳሮ ቶሆ ኦዳሰ፣ ሺን ሃዒካ ዛራዳ አፋላን ኦዳይሰ። ከሪስቶሲ ማሰቃሊያ ቦላ ሃይቁዳይሳሰ ባንታና ሞርኬ ኦሊዳ ዳሮ አሳቲ ዴዎሶና።

19 ኤንታ ዉርሴላይ ጳዮ፤ ኤንታ ኡሎይ ኤንታው ያሴ። ዬላታናው ቤሲያባን ኤንቲ ጨቁቶሶና፤ ቃሲ ሃ ሳዓባ ያላላ ቆፖሶና።

20 ኑ ቢታይ ሳሉዎና። ሳሎፔ ዬዲ ኑና አሻናው ዴዒያ ጎዳ ዬሱሰ ከሪስቶሳ ናጎሰ።

21 ከሪስቶሲ ኡባባ ባ ማታፔ ጋርሳን አላናው ዳንዳዒያ ባ ዎልቃን ኑ ዳቡራንኞ አሳቴላ ላሚዲ ባ ቦንኞ አሳቴላ ዳኒሳና።

4

ወርሴላ ዘሬ

1 ታ ኢሻቶ፣ ታ ደሴይሳቶ፣ ታ ላሞቴይሳቶ፣ ታና ኡፋይሴይሳቶ፣ ታና ጊታዬይሳቶ ሂዛ ጎዳን ሚኒዲ ኤቁቴ።

2 ኤዎዲኔ ሲንጻካ፣ ሂንቴ ናምዓይ፣ ኢሲ ቆፋን ሚቺዳ ጎዳን ዳናዳ ታኒ ሂንቴና ዘራይሰ።

3 ታራ ኦሊያ አማንጴይሶ፣ ኔኒ ሃ ማጫሳታ ማዳና ማላ ታ ኔና ዋሳይሰ። ሃ ማጫሳቲ ታራ፣ ቁሌሚንጾሳራኔ ኤንታ ሱንሳይ ጾሳ ዴጾ ማፃፋን ፃፊቲዳ ሃራታራ ኢሲፌ ዋንጌላ ኡባ ቤሳ ጋላናው ዳቡሪዶሶና።

4 ጎዳራ ሂንቴ ዴዒያ ዴዑዋን ኡባ ዎዴ ኡፋይቲቴ። ታኒ ሄሳ ጉጃዳካ ኦዳይሰ፤ ኡፋይቲቴ።

5 አሳ ኡባይ ሂንቴ አሽኬቴላ ኤር፤ ጎዳይ ማታን ያና።

6 ጾሳ ሂንቴ ዎሲያ ዎዴ ኡባን ኢያ ጋላቲሹ፣ ሂንቴና ኮሺያባ ኡባሰ ዎሲቴቴ ኣቲን አይቢባሰካ ሂርጎፊቴ።

7 አሳ ኤራቴላ ኡባፌ አጂያ ጾሳ ሳርቴላይ፣ ሂንቴ ዎዛናኔ ሂንቴ ቆፋ ጎዳ ዬሱሰ ኪሪሰቶሳ ባጋራ ናጋና።

8 ወርሴላን፣ ታ ኢሻቶ፣ ሂንቴ ዎዛናን ሎጾባኔ ጋላቲሲያባ ቆጊቴ። ቱማ ጊዲያባ ኡባ፣ ቦንቾባ ኡባ፣ ቆሆ ጊዶናባ ኡባ፣ ጌሻባ ኡባ፣ ሲቆባ ኡባኔ ኡፋይሴይሰባ ኡባ ቆጊቴ።

9 ሂንቴ ታፔ ታማሪዳባ፣ ኤኪዳባ፣ ሲዒዳባኔ ቤዒዳባ ኡባ ኦሊቴ። ሳርቴላ አሚያ ጾሳይ ሂንቴራ ኢሲፌ ጊዳና።

ጳውሎሲ አሜቲዳ አሞታሰ ጋላቲሰ

10 ዳር ዎዴፔ ጉዬ፣ ሂንቴ ታባ ዛሪዲ ቆጋናው ደሚዳ ጊሾ ታኒ ጎዳን ዳር ኡፋይታይሰ። ሄሳ ጉሳይ፣ ታው ቆጋናው ሂንቴው ኢንጃቶና ኢጻዳይሳፌ ኣቲን ታው ቆፋ አጊቤከታ።

11 ታኒ ሄሳ ታና ሜቲዳ ጊሾ ጊከ፤ ታው ዴዒያባይ ጊዳና ጉሱ ታማራሰ።

12 ታኒ ሜቶቴቲዲ ዴዒያ ዴሲ ኤራይሰ፤ ቃሲ ዴሬቲዲ ዴዒያ ዴሲካ ኤራይሰ። አዉን ጊዲን ቃሲ አይ ዎዴካ ታኒ ካሎኔ ኮሻ፣ ፓጩኔ ፓላሃ ታማራሰ።

13 ኪሪሰቶሲ ታው አሚያ ዎልቃን ኡባባ ኦላናው ዳንዳባይሰ።

14 ጊዲኮካ፣ ሂንቴ ታ ሜቱዎ ታራ ኤኪዳይሳን ሎጾ ኦሊዴታ።

15 ፊልጲሲዩሳ አሳው፣ ዋንጌላ ኮይሮ ኦዳናው ታኒ ማቁደኒያ፣ ከያ ዋዴ ኢሚያባንካ ኤኪያባንካ ሂንቴ ዋሳ ኬላፊ አቲን ሃሪ ታና ማዲቦናይሳ ሂንቴ ኤሬታ።

16 ቴሴሎንቄን ሜቶይ ጋኪዳ ዋዴካ ታና ዛሪ ዛሪዲ ማዲዴታ።

17 ታኒ፣ ሂንቴፊ አሞታ ኤካናው ኮያዳ ጊደናሺን አሞፔ ያ አንጂዋ ሂንቴ ኤካና ሜላሳ።

18 ታኒ፣ ሂንቴ ኢሚዳ ኡባኔ ጊዲዲ ፓላሄይሳ ኤካሰ። ሂንቴ ዬዲዳ ኡባ ኤጳፊራዲቱሳ፣ ኤካሰ፤ ኮሺያባ ኡባይ ታው ዴዴሰ። ሂንቴ ታው ዬዲዳ አሞይ ያሳሰ ሳዋ ቶንጉ ጊያ፣ ኢ ደሲያ፣ ኢ ኡፋይቲያ ያርሾ ሜላ።

19 ታ ያሳይ ባ ቦንቾ ዲሬቴላፊ፣ ኪሪሰቶስ ዬሱሳ ባጋራ ሂንቴው ኮሺያባ ኡባ አማና።

20 ኑ አዋ ያሳሰ ሜሪናፔ ሜሪና ጋካናው ቦንቾይ ጊዶ። አሚንዲ።

ዉርሴላ ሳርታ

21 ኪሪሰቶስ ዬሱሳ ባጋራ ያሳባ ጊዲዳ ኡባ ሳሮ ጊቴ። ታራ ዴዴያ አሻቲ ሂንቴና ሳሮ ጎሶና።

22 ያሳባ ጊዲዳ አሳ ኡባይ፣ ኡባፊ አሲዲ ካዉዋ ቄሳሬ ኬላን ዴዴይሳቲ ሂንቴና ሳሮ ጎሶና።

23 ጎዳ ዬሱሰ ኪሪሰቶሳ አጵ ኬሃቴላይ ሂንቴራ ጊዶ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5